

# Carta xi catsihindu Santiago

---

Cjua xi catsihindu Santiago me xi hacuaha yahañihi rë Jacobo

**1** Ngahan Santiago, xi mosu hndixahan tsëhë Nina cojo tsëhë Nai naja Jesucristu ne, tsingátju ngu nina tsujun, ngayujun ni xi xuta ladu rë Nina ngayun, ngayujun ni xi cavitsojo yun ngasunhndë.

Cjuatacun ndaja xi nduva tsëhë Nina

<sup>2</sup>Ngayujun ni tsan ne, ngajñi rë yëjë ni xcusun cjuacjintacun xi cuátjun cuma ne, meje rë xi ndaja catama rë xahasen nuju ta, <sup>3</sup>tsëhë xi ha hyun ta, hya xi cavatju xi cacaa nuju cojo ngu cjuacjintacun jan ne, sa xi hacuiin canismutacún cjuachacun xi macjain nuju ne, vëhë cuisecoo nuju xi hitsë sa scaa nuju tu mé ni cjuacjintacun xi cuátjun sa cuma. <sup>4</sup>Peru nihñu ngujyë xi scaa nuju cojo yëjë ni cjuacjintacun jan hisca xi cuijnetaha. Sehe ngajan xi cuma yun xuta tyjahi xi chutaha cjuatacun rë xi cuma sahmi yëjë ni cjuandaja.

<sup>5</sup>Peru sa xi yo yun xi sahmi chaja nuju cjuatacun ne, chjahyun rë Nina, hane sacú nuju ta, tsëhë

xi Nina ne, hisca sesuntaha sa hya xi sua naja me, hacuaha hacuiin chjahnga me cojo naja, hya xi chjahyan rë me. <sup>6</sup>Peru meje rë xi catamangutacún hora xi chjahyun rë me, hacuiin jo cuma tacún ta, tsëhë xi xuta xi jo má cacun me ne, tangun me cojo tsindyu rë ndachacun xi ficojo rë tjo, xi fi nguehe fi ngajan. <sup>7</sup>Xuta xi cuatjin cun me ne, catijnercu me ta tsajin mé xi sua Nina me ta, <sup>8</sup>tsëhë xi jo má cacun me, jo xcun jo hntsua me tsëhë yëjë ni xcusun xi sahmi me.

<sup>9</sup>Peru xuta yuma xi ladu rë Nina me ne, ndaja catama rë xahasen rë me ta, xcun Nina ne, jercu vengui chjí rë me. <sup>10</sup>Hane xuta nchina xi ladu rë Nina me ne, hacuaha ndaja catama rë xahasen rë me, hya xi cuijnercu me xi yëjë ni cjuanchina rë me ne, hisca venguiin chjí rë xi cuma rë Nina. Xuta nchina ne, cjuë me sacuatjin fë naxu ndexin. <sup>11</sup>Hya xi tjercu ma suë chan ndavá ne, xca jan ne, fë yëjë xi. Hacuaha naxu rë ne, fë vixu. Xcusun rë ne, handasa tjercu ndajyihí camahani ne, fë vetsun. Hacuanitjin ni cjuë xuta nchina ngajñi rë cjuayuma xi sahmi me.

### Cjuatacun tsehen

<sup>12</sup>Jemu ndaja tsajan ngayaan, sa xi scaa naja cojo yějē ni cjuacjintacun xi cuátjun cuma ta, hya xi cavatju xi cacaa naja ne, hya sacú naja ngu cjuahñu ndajyihi ngajan xcun Nina. Ta cachja Nina xi, sa xi hmutacun me ne, sua naja me ngu cjuahñu ndajyihi jan. <sup>13</sup>Hya xi xahasen naja meje rē xi nihña ngu cjuatacun tsehen ne, mijí rē xi cuinújan xi Nina casua naja me cjuatacun tsehen jan, ta Nina ne, hatuxa tsajin rē me cjuatacun tsehen, hacuaha hatuxa suaain naja me cjuatacun tsehen xi nihña. <sup>14</sup>Peru cjuatacun tsehen xi meje nihña ne, hatuxa vetju tsēhē xahasen naja suvaan. <sup>15</sup>Hya xi ningatahantacun xi meje nihña cjuatsehen ne, cjuatacun jan sahmi xi nihña cjuatsehen. Hane sa xi hatuxa ningatehen rē yějē ni cjuatsehen xi nihña ne, sacuiin cahndé cuechun xcun Nina. <sup>16</sup>Ngayujun ni tsan ne, mijí ná xi cuma ndacha ngayun. <sup>17</sup>Yějē ni cjuandaja ndajyihi xi sacú naja ne, nduva tsēhē ngahnga ta, Nina xi casahmi me yějē ni ndihi xi siutaha ngahnga ne, me vėhē sua naja me yějē ni cjuandaja jan. Ndihi xi siutaha ngahnga jan ne, vindeya xcusun rē ta, tjin hora sua ndavá rē ne, tjin hora suaain ndavá rē. Peru Nina ne, chuva xi tacun ni me, tsajin vindeya cjuatacun rē me. <sup>18</sup>Hane hora xi camacjain naja cjuaxi xi cjuaquixi ne, hora hya casua naja me ngu cjuahñu xatsē. Cuatjin casua naja me ta, tsēhē xi meje rē me xi ngayaan ne, tjun tjun cuma

yaan xuta ladu rē me. Sehe ngaxtun vėhē ne, cjín sa xuta xi hacuaha cuma me ladu rē Nina.

### Cuitjin xi chjahanrcun jain Nina

<sup>19</sup>Ngayujun ni tsan ne, hya xi yo cuichja cojo nuju ngu cjuaxi ne, titjun tinuhyunndujun mé cjuaxi cuichja me. Hacuiin ngutjen chjayunngun, hacuiin ngutjen cuma cjan nuju. <sup>20</sup>Ta sa xi cjan nuju ne, nihñuu cjuandaja sacuahatjin xi meje rē Nina. <sup>21</sup>Peru yějē ni cjuatsehen ne, meje rē xi tiyujunxun. Hane cjuaxi rē Nina xi camacjain nuju ne, tetjún cojo cjuandaja cojo cjuajeya cahntsua xahasen nuju ta, tsēhē xi cjuaxi vėhē ne, cuma cuaxětje nuju. <sup>22</sup>Hane sa xi tu cuisinuju ni cjuaxi rē Nina jan, hane nihñuu hacutjin xi chja ne, tu cuindachun suvun ni rē yojo nuju. Vėhē xi hacuiin tu cuisinuju ni ta, meje rē xi nihñuu yějē ni hacutjin xi vitexa cjuaxi rē Nina. <sup>23</sup>Sa xi tu cuisinuju ni hane nihñuu hacutjin xi vitexa cjuaxi ne, tangun yun cojo ngu cha xi vutsejenya cha xcun cha cojo espeju. <sup>24</sup>Cavutsejenya cha xcun cha hacutjin jyihi cha ne, peru xi cafe cha ne, ngutjen cachaya rē cha hacutjin jyihi cha. <sup>25</sup>Peru hya xi cuisinuju cjuaxi vitexa Nina jan ne, sa xi chutayun sa cjuaxi, sa xi chayaaain nuju cjuaxi, sa xi nihñuu jain hacutjin xi vitexa cjuaxi jan ne, sacú nuju cjuandaja rē Nina xcun ngasunhndē nuju. Cjuaxi rē Nina xi cuacun jan ne, hatuxa cjuaquixi, hacuaha cjuaxi vėhē xi vėhēndaya naja tsēhē ngajñi rē cjuatsehen. <sup>26</sup>Sa xi tiningatuhuntacún xi jemu ndaja tichjuhuncun jain

rë Nina, ngajñi rë xi tujyë choho vetju ntsuvun nújun ne, tu mahya xi chjuhuncun rë Nina ta, tu tivindachun suvun ni rë yojo nuju. <sup>27</sup>Jyan xcusun vihi xi chuya rë Nina Nahmi naja xi nihña: ngu ne, xi chjahanrcun jain me cojo ngu xahasen xi tyjahi; má jo ne, xi cuisecoon rë hndixahan cojo chjuun cahan ngajñi rë cjuacjintacun rë me; xi ma jyan ne, xi hacuiin nihña cjuatsehen.

**Meje rë xi chjahanrcun yëjë ni xuta**

**2** Ngayujun ni tsan ne, quihndë xi macjain nuju Nai naja Jesucristu, me xi tjemu tjin rë cjuandaja ne, mijí rë xi nihñu jyë ngu xuta ne, hane nihñu chuvun nga ngu me. <sup>2</sup>Sa xi cuisehen ngu xuta nchina cahntsua yungun nuju, xi hisca oro xtungun rë me hacuaha tjercu ndajyihi tsjian rë me ne, hacuaha cuisehen nga ngu xuta xi yuma cojo tsjian rë me xi jyihi ntsun ntsun me ne, ¿mé cuinújun cojo rë me? <sup>3</sup>Me xi ndajyihi tsjian rë jan ne, ¿há jemu chjuhuncun me, xi cuitjin cuinújun cojo rë me?: “Tinechun nguehe cahndé ndajyihi vihi.” Hane me xi yuma jan ne, ¿há cuitjin cuinújun cojo rë me?: “Ngaye ne, ngajan nechin jan”, o sa tsajin ne: “Nguehe nechin nguehe nangui.” <sup>4</sup>Sa xi cuatjin cuinújun ne, ngajan matsejen xi hisca ngajñi nuju ne, hacuiin tangun xcusun nuju xi nihñu cojo ngayëjë ni xuta. Tinichuvun xingun ni ne, peru cojo ngu cjuatacun tsehen.

<sup>5</sup>Ngayujun ni tsan ne, tinuhyun cjua vihi. Nina ne, cavaxijin me xuta xi yuma xcun ngasunhndë,

cojo sa xi tjemu ndaja cumacjain rë xuta jan me, hacuaha sacú rë xuta jan cahndé ndajyihi nixtin xi cuetsihin cuitexa jain me ngajñi rë yëjë ni xuta ngasunhndë, sacuatjin xi ha cachja me xi sacú rë yëjë ni xuta xi tsihmucacun me Nina. <sup>6</sup>Peru ngayun ne, nisavun rë xuta yuma. Peru ¿yo xi choho sahmi cojo nuju ni? ¿Yo xi faha nuju, fi vinchajyé nuju xcun xutaxa rë? Xuta nchina xi cuatjin sahmi cojo nuju. <sup>7</sup>Hacui jain me. Hacuaha xuta xi nchina ne, me vëhë xi choho chja me tsëhë Jesucristu. Hane Jesucristu jan ne, hacui me xi casua naja ñihi xi tsëhë suvá me.

<sup>8</sup>Xcun xujun rë Nina ne, camahindu ngu cjua xi cavitexa Nina, xi chja cuitjin: “Meje rë xi nihmitacuín xinguin sacuahatjin nihmitacuín yojo rijí.” Sa xi cuatjin jain nihñu ne, jemu ndaja tjin. <sup>9</sup>Peru sa xi nihñu jyë ngu xuta hane nihñu chuvun nga ngu me ne, ha canichujún cjua xi cavitexa Nina. Hacuaha suvá cjua jan ne, vëhë cuinchajyé nuju ta canihñuun hacutjin chja cjua jan. <sup>10</sup>Ta sa xi nichujún ngu cjua xi cavitexa Nina ne, handasa nihñu yëjë ni cjua xi yahnga ne, peru tangun jyé nuju cojo jyé rë ngu xuta xi hndiin camahani tsëhë yëjë ni cjua xi cavitexa Nina jan. <sup>11</sup>Cuatjin ta, tsëhë xi ngu ni Nina xi cavitexa me catsijo cjua vihi. Ngu ne: “Xi canindesiin cojo rë ngu chjuun, o cojo rë ngu xihin xi xín.” Ngu nga ne: “Xi caniquiin xuta.” Vëhë xi handasa hacuiin nindesun cojo rë ngu chjuun, peru sa xi nicuhun ngu xuta ne, ha canichujún cjua

xi cavitexa Nina jan, hane tjin jyé nuju xcun cjua vëhë. <sup>12</sup>Ngajan xi meje rë xi tinújun hacuaha nihñu cjuandaja, sacuaha xi ha ndiya tsichuva nuju Nina, scutsejen me hacutjin canihñu xi vitexa cjua xi vëhëndaya naja. <sup>13</sup>Hane sa xi tsajin nuju cjuayumatacun cojo jingu sa ne, hacuaha tsajin rë Nina cjuayumatacun cojo nuju nixtin hya xi tsichuva nuju me. Peru sa xi tjin nuju cjuayumatacun ne, hacuaha tjin rë Nina cjuayumatacun cojo nuju nixtin hya.

**Sa xi macjain jain naja ne, nihña cjuandaja**

<sup>14</sup>Ngayujun ni tsan ne, sa xi cuinújun xi macjain nuju Jesucristu, peru nihñuu cjuandaja ne, hisca vengui chjiin rë ta, tsëhë xi Nina ne, cuaxintjiin nuju me xi cuatjin nihñu. <sup>15</sup>Hya xi sacú xingun cojo ngu xuta ladu rë Jesucristu xi jemu yuma camahani, xi jercu ntsun tsjian rë me, hacuaha hisca tsajin niñu xi sinë me ne, <sup>16</sup>¿há cuitjin cuinújun cojo rë me? “Tangún ni tsan. Xicamacjiintacún. Ndaja tetsun yojo nuju ta jemu hnchan, hacuaha ndaja xinu niñu ta quiji hora.” Peru sa xi tsajin mé catuhun rë me xi cuaja xi sinë me ne, vengui chjiin camahani rë xi cuatjin cuinújun cojo rë me. <sup>17</sup>Vëhë xi vengui chjiin rë xi tu suvá cuinújan ni xi macjain naja Jesucristu nguyëjë rë xi mijí nihña cjuandaja.

<sup>18</sup>Peru tjin ngu cha xi cuichja cuitjin: “Hacjahi xuta xi macjain rë me Jesucristu, handasa sahmi me cjuandaja. Hacjahi xuta xi sahmi me cjuandaja, handasa macjaain rë

me Jesucristu.” Peru ngahan cuichjá cojo rë cha jan ta hacuiin hacjahi xuta ta ¿hacutjin cuma xi macjain jain naja, sa xi hacuiin nihña cjuandaja? Ngatsë rë cjuandaja xi nihña ne, vëhë tsejen xi macjain jain naja Jesucristu. <sup>19</sup>Cha vëhë ne, ¿há macjain jain rë cha xi tjin ngu ni Nina? Tjemu ndaja tjin xi cuatjin macjain rë cha. Peru hacuaha xitsehen ne, cuatjin macjain rë, hane ña fatsë xitsehen má xi tsacjun. <sup>20</sup>Tjemu yumahasen cha xi cuatjin cuichja jan. Peru nguehe cuichjá cojo rë cha ngu jo cjua, cojo sa xi cuijnercu cha ta, vengui chjiin rë xi cuinújan xi jercu macjain naja Jesucristu, sa xi mijí nihña cjuandaja. <sup>21</sup>Sacuaha xutachanga naja Abraham ne, ha hyan xi hatsëë nixtin ne, camangucacun me xi tsiquehen me quihndi rë me xi hmí Isaac ngajan xcun ngasunscun, sacuatjin xi ha cachja Nina cojo rë me. Hane ngatsë rë xi cuatjin cahndë me tsëhë Nina ne, vëhë xi cachja Nina xi ngu xuta ndaja me, ngu xuta tyjahi me. <sup>22</sup>Ngajan matsejen ta xcusun xi casahmi me ne, cama tangun cojo cjua xi macjain rë me. Hacuaha ngatsë rë xi cuatjin casahmi me ne, vëhë xi camatsejen ta macjain jain rë me. <sup>23</sup>Cuatjin camá sacuatjin chja ngu cjua xi camahindu xcun xujun rë Nina, xi chja cuitjin: “Abraham ne, camacjain rë me Nina. Vëhë xi Nina cachja me xi ngu xuta ndaja me, ngu xuta tyjahi me.” Hacuaha cachja Nina tsëhë me ta amigu rë me.

<sup>24</sup>Cuatjin xi hyan xi chja Nina xi xuta tyjahi yaan sa xi nihña

cjuandaja, hacuini sa xi tu suvá ni macjain naja. <sup>25</sup>Hacuaha ni tjin ni cavatju na xi hmí rë Rahab, na xi caviteña na yojo rë na. Cama tyjahi xahasen rë na ta, tsëhé xi casahmi na ngu cjuandaja, hya xi cojo cjuandaja casua na cahndé xi caviyuju xuta ndava na, xuta xi catsingatju xutachanga naja ngajan nangui rë na. Hacuaha hacjahi ndiya xi catsingacun na me, xi cuetju me cjue me hiscan xi tsajin condra rë me. <sup>26</sup>Sacuatjin xi machjiriin yojo rë ngu nima ta tsajin hasen rë ne, ha cuatjin machjiriin xi macjain naja Jesucristu, sa xi tsajin cjuandaja xi nihña.

#### Hacutjin sahmi neje

**3** Mijí rë xi cjin ngayun cuma yun maestru tsëhé cjuachacun tsan ta, ha hyun ta ngayin xi vicuyin cjuachacun ne, hitsë sa tsichuva niji Nina xi cuma rë xuta xi yahnga. <sup>2</sup>Ngayejen ni ne, hatuxa cjin cjuatsehen xi nihña. Peru sa xi suvá cjuandaja chja ngu xuta, hane hisca ngu cjuachoyihin chjaain me ne, me vëhé ne, ngu xuta ndaja me, ngu xuta tyjahi me. Hacuaha ma vetjo me yojo rë me. <sup>3</sup>Sacuaha ngu naxin ne, sa xi cueyan frenu hntsua chu cojo sa xi cuihndé chu tsajan ne, vëhé sahmi xi cuma cuanguen cojo chu tu cutjin hiscan xi meje naja. <sup>4</sup>Hacuaha sacuaaha tjin barcu ne, handasa tjercu jyihi, handasa jemu hñu ngahñu rë tjo xi tsivaha rë ne, peru cha xi cjuicojo barcu jan ne, ngu sasa ni tsiniya cha ngu ya lihndi xi hmí rë timú, sehe ficojo cha tu cutjin hiscan xi meje cjue cha. <sup>5</sup>Hacuaha ni tjin ni

neje ta, ngu rquí lihndi ni tsëhé yëjë ni yojo naja. Peru handasa lihndi ne, tjemu yehe cjuahaxi xi nújan cojo rë. Sacuaaha ngayaan ne, xi cuetahan rë ngu ndihi ne, handasa ngu ndihi lihndi ni ne, peru cuma cuaca rë yëjë ni ngu nguijñacha. <sup>6</sup>Hane neje ne, tangun cojo ndihi ta tjemu cjan rë. Tjercu ma chja cjuatsehen. Handasa tjin cahndé rë xi quitaha ngajñi yojo naja ne, peru caa rë tsinguetsun naja. Vëhé xi tjercu choho vatjun má xcun ngasunhndé naja ta, tsëhé xi xitsehen ne, vëhé sahmi xi choho nújan. <sup>7</sup>Ngayaan xuta ne, camá canimaxun yëjë ni xcusun chu, sacuaaha chu nguijña, chu nisë, chu yë, cojo chu ti. <sup>8</sup>Peru neje ne, tsajin yo cuma tsimaxu rë ta, hatuxa tsehen yojo vëhé. Suaain cahndé xi cuma maxu. Hacuaha sacuaaha nehñu chu yë cjan rë, xi quitsë rë xan rë chu xi tsiquehen naja hya xi faha chu ne, cuatjin neje ta, quitsë rë cjuatsehen xi choho nújan. <sup>9</sup>Ha cojo neje ni ne, ndaja nújan tsëhé Nina Nahmi naja, hane ha cojo vëhé ni ne, nchaten tsëhé xingueen, handasa casahmi naja Nina sacuaaha jyihi suvá ni me. <sup>10</sup>Tsëhé ntsuvan ni ne, tecjan cjuandaja cojo cjuatsehen xi vetju nújan. Cuaaintjin camahani xi nújan, tsan. <sup>11</sup>Ngu nandan ne, hatuxa cumaji cuetju tangun nandá xi hyun cojo nandá xi sa. <sup>12</sup>Hane ngu ya laxa ne, cumaji cuaqui rë tsë. Hacuaha ngu nahñu tutsëjë ne, cumaji sua laxa rë. Hacuaha ni tjin ni nandá xtya ne, suaain nandá yufa.

#### Cjuatacun xi vengui chjí rë

<sup>13</sup>Sa xi tjin ngajñi nuju ngu ngayun xi tjemu vechutaha

cjuatacun nuju ne, meje rë xi nihñu cjuandaja. Meje rë xi cuma tsejen xi xuta ndaja xuta jeya ngayun, ngatsë rë xi nihñu cjuandaja xi vitexa cjuatacun nuju. <sup>14</sup>Peru sa xi tjin nuju cjuaxin cahntsua xahasen nuju, hane sa xi meje nuju xi suvun ni ngayun xi ndajyihni cuátjun cuma ne, meje rë xi hacuiin nihñu yehe yojo nuju, hacuiin núnjun xi tjercu vechutaha cjuatacun nuju ta, quixiin vë. <sup>15</sup>Ta cjuatacun vëhë ne, hacuiin ngu cjuatacun xi casua Nina ta cjuatacun ni rë xutajyë ngasunhndë vihi, sacuaaha cjuatacun rë xitsehen. <sup>16</sup>Hiscan xi tjin cjuaxin, hiscan xi tjemu choho me, ngajan ne, tjemu tujyë sahmi xuta, tjemu sahmi me yëjë ni cjuatsehen. <sup>17</sup>Peru sa xi tjin naja cjuatacun xi nduva tsëhë Nina ne, tjemu tyjahi xahasen naja, tjemu tjin rë cjuajeya xahasen naja, nihña yëjë ni ngu cjuandaja, tjin naja cjuayumatacun cojo xuta, tacun cahndé cjuatacun naja, hacuiin jo má tacun. <sup>18</sup>Hane sa xi ngatsë rë cjuandaja xi nihña cuma cuijnetaha si xi tjin ngajñi rë xingueen ne, cjuandaja cuinechan cojo xingueen, hane yahnga sa xuta ne, hacuaaha cuetsihin sahmi me cjuandaja.

**Xuta xi tjercu macacun  
me cojo ngasunhndë**

**4** ¿Mé má cuatjin tjercu nihñu si ngajñi nuju? ¿Mé má cuatjin chicjun cojo xingun? Nihñu ngatsë rë yëjë ni cjuatsehen xi tjercu meje rë xahasen nuju. <sup>2</sup>Tu mé ni ne, meje nuju, peru ngatsë rë xi sacuiin nuju ne, vëhë xi nicuhun xingun. Tjin nuju ngu cjuaxin tsëhë tu mé ni,

peru ngatsë rë xi sacuiin nuju ne, vëhë xi vetsuhun si cojo xingun, vetsuhun chicjun cojo xingun. Sacuiin nuju xi meje nuju ta, tsëhë xi chjahyuun rë Nina. <sup>3</sup>Hacuaha handasa chjahyun ne, peru sacuiin nuju ta, tsëhë xi hacuiin tsëhë cjuandaja xi chjahyun ta, xi chjahyun ne, tu nicujun ngajñi rë ngu cjuasua xi fehya xahasen nuju. <sup>4</sup>Ngayun xi jo xcun jo ntsuvun ne, ¿há hyuun ta sa xi tjenguen xcusun rë xuta ngasunhndë ne, má yaan condra tsëhë Nina? Vëhë xi tu yo ni xi vejñangucacun xi tjengui xcusun rë xuta ngasunhndë ne, sahmi me condra Nina. <sup>5</sup>Hacuiin tu cuenda camahindu xcun xujun rë Nina, hiscan xi chja cuitjin: “Nina ne, casua naja me ngu hasen xi tacun cahndé cahntsua xahasen naja. Vëhë xi mijí rë Nina xi cuetjunxen tsëhë ladu rë me.” <sup>6</sup>Hacuaha Nina ne, visecoo naja me cojo yëjë ni cjuandaja rë me, ta tjin sa ngu cahndé ngajan xujun rë me xi chja cjua rë me cuitjin: “Nina ne, chuyiin rë me tsëhë xuta xi sahmi yehe yojo rë, peru xuta xi jeya me ne, sua Nina me cjuandaja.” <sup>7</sup>Vëhë xi meje rë xi tinuhyun tsëhë Nina. Sa xi nihñuu hacutjin xi meje rë xitsehen ne, cuetjuxin xitsehen tsujun. <sup>8</sup>Tejñutsja Nina cjuatacun nuju, hane sehe Nina ne, cuaha nuju me. Tiyujunxun cjuatsehen xi tinihñu, hane ngayun xi jo má tacún ne, nihñu tyjahi xahasen nuju. <sup>9</sup>Catamavatacún, hacuaaha chjihndun, tsëhë xi canihñu cjuatsehen. Cahndé rë xi cuéjnu ne, chjihndun, hane cahndé rë xi sua ma nuju ne, choho catama

nuju. <sup>10</sup>Ninguijnu cjuatacun nuju xi chjuhuncun Nai naja, sehe Nai naja ne, sahmi yehe nuju me.

**Mijí rē xi nichuvan xingueen**

<sup>11</sup>Hacuiin choho nújun tsēhē xingun tsan ta, sa xi choho nújun tsēhē xingun ne, tangun vėhē cojo xi choho nújun tsēhē cjua xi vitexa Nina. O sa xi nichuvun xingun ne, tangun vėhē cojo xi nichuvun cjua xi vitexa Nina. Hane sa xi nichuvun cjua xi vitexa Nina jan ne, hacuiin tiniññu hacutjin xi vitexa ta, tiniññu yojo nuju sacuaha ngu xutaxa rē. <sup>12</sup>Peru ngu ni me xi cavitexa hacutjin xi nihña, hane ngu ni me vėhē xi tsichuva me. Me vėhē ni xi cuma cuaxětje naja me, me vėhē ni xi cuma tsinguetsunya naja me. Peru ngayun ne, ¿yo cavitexa nuju xi nichuvun xingun?

**Tsajin yo vėē rē mé xi cuma nchujun ni**

<sup>13</sup>Nguehe cuichjá ngu cjua. Tjin ngu jo yun xi cuitjin nújun cojo xingun: “Nchujun ni nguini ne, cuétjun cuanguen ngu nangui. Ngajan cuinechan ngu nu xi nihña cjuayuma naja. Cuatjin nihña, sehe sacú naja tujún.” <sup>14</sup>Peru hisca hyúun hacutjin cuátjun cuma nchujun ni nguini. Ngayaan xcun ngasunhndē naja ne, tangun yaan cojo yufí nangui ta, yufí jan ne, tsejen hora xi nduva. Peru xi tu ngu hora ne, ha cavatjucjin, cafēya. <sup>15</sup>Vėhē xi hitsē sa ndatjin xi cuitjin cuinújun: “Sa xi Nai naja meje rē me ne, sua sa me cjuahñu naja xi nihña cuitjin cuatjin xa.” <sup>16</sup>Peru ngayun ne, tjerco nihñu yehe yojo

nuju xi nújun cojo xingun hacutjin xi meje nihñu. Hane xi cuatjin nihñu yehe yojo nuju ne, ngu cjuatsehen vėhē. <sup>17</sup>Hane sa xi ha hyan hacutjin fi yějē ni cjuandaja, peru mijí nihña ne, tjin jyé naja xcun Nina.

**Hacutjin cuatju xuta nchina cuma**

**5** Quihndē ne, ngayujun ni xi nchina yun ne, meje rē xi chjindayun chjihndun, ngatsē rē yějē ni cjuachoho xi cuátjun cuma. <sup>2</sup>Yějē ni cjuanchina nuju ne, cuenguichjiin rē ta, tsēhē xi cjuē yějē cjuehndu. Sacuaha tsjian ndaja nuju ne, cjuē sinē chu quixún. <sup>3</sup>Sacuaha tujún ndaja nuju ne, cuma xutsē. Hane tsēhē xi cuatjin xutsē tujún nuju ne, vėhē tsejen xi canihñuu cjuandaja cojo tujún jan, hane ngatsē rē vėhē ne, cuátjun castigu cuma. Tjerco tivetjun camahani cjuanchina nuju quihndē, nixtin xi ha ndiya cuijnetaha cjuē ngasunhndē. <sup>4</sup>Cjēē cjuē cuechjun yějē ni chjí rē mosu nuju xi casahmi xa nguijña nuju, hane Nai naja ne, me xi ma titjun tsēhē yějē ni ne, vihndē me cjua xi tivinchajyē yějē ni mosu nuju xi quitjun tsēhē. <sup>5</sup>Nguehe ngasunhndē vihi ne, tjerco ndajyihí cavatjun camá, tjerco catuhun rē cjuasua yojo nuju. Peru sacuatjin xi hatuxa vechu nixtin xi cueya chu chinga xi jercu hñucacun chu ne, hacuaha ni tjin ni cuechu nixtin xi cuátjun castigu cuma. <sup>6</sup>Ngayun ne, canihñu castigu canicuhun xuta ndaja xuta tyjahí. Hane xuta ndaja xi cuacun jan ne, johó ni rē me xi canihñu cojo rē me.



**Meje rë xi cuinechanyan rë Nina  
cojo jeya hacuaha chjahyan rë Nina**

<sup>7</sup>Vëhë xi tinechunyun cojo jeya tsan, hisca xi cuinduva nga Nai naja. Cha xi sahmi xa nguijña ne, xi cjuë cuincha cha tjë ne, cuejñaya cha cojo jeya hisca xi cuatju chan tsi ne, sehe cuma sacú rë cha ngu cosecha xi ndajyihi tsëhë xitjë rë cha. <sup>8</sup>Hacuaha ni tjin ni, meje rë xi tinechunyun cojo jeya, hacuaha tejñuhñu xahasen nuju ta, tsëhë xi jima tiña nixtin xi cuinduva nga Nai naja. <sup>9</sup>Sa xi cuinchunyun xingun tsan ne, hacuaha cojo ngayun cuma yun castigu. Vëhë xi mijí rë xi cuinchunyun xingun ta, tsëhë xi me xi tsichuva naja ne, chaja sa hitsë xi cuinduva nga me. <sup>10</sup>¿Há vitsjiin nuju hacutjin cacaa rë yëjë ni xutachanga naja xi cachja me cjua xi caveya Nina cjuatacun rë me hatsëë nixtin? Me xi cuacun vëhë ne, casahmi me cjuetacun ngajñi rë yëjë ni cjuañihi xi cavatju me camá. Hacuaha cuatjin meje rë xi nihñu tsan. <sup>11</sup>Hatuxa nújan xi tjercu ndaja tsëhë me xi cacaa rë cojo cjuañihi. Ngayujun ni ne, ha machaya nuju cjua xi chja hacutjin cacaa rë ngu xutachanga naja xi hmí rë Job, hya xi cavatju me cjuañihi camá. Hacuaha ha hyun ta, hya xi cajnetaha cjuañihi xi cavatju me camá ne, tjemu ndaja casahmi Nai naja cojo rë me ta, tsëhë xi Nai naja ne, hatuxa tjin rë me cjuandaja, tjin rë me cjuayumatacun.

<sup>12</sup>Nguehe cuichjá cojo nuju ngu cjua xi tjemu vengui chjí rë tsan. Hora xi tivisiajmu cojo xingun ne, hacuiin cuinújun xi vëë Nina, vëë tsuhi, hacuiin cuinújun xi vëë tu mé sa ni xcusun. Meje rë xi yëjë ni xi cuinújun ne, cjuaquixi, hacuiin

cuindachun. Sehe ngajan xi Nina ne, sahmii nuju me castigu.

<sup>13</sup>Sa xi choho tivatjun jima ne, chjahyun cjuandaja rë Nina. Sa xi tjemu sua nuju ne, sun ngu xi nihñu jyë nihñu hnga Nina. <sup>14</sup>Sa xi hmu nuju ne, chjindayun rë xuta changá xi vitexa ngajñi rë xuta ladu rë Nina, xi tsufë nuju me aceite hacuaha cjuehya me cjuandaja rë Nai naja ngatsë nuju. <sup>15</sup>Sa xi nguñajatacun hora xi chjahyan cjuandaja rë Nina ne, xuta hmu rë jan ne, cumandaja me ta, Nai naja ne, sua rë me cjuahñu. Hane sa xi casahmi xuta hmu rë jan ngu cjuatsehen ne, Nina tsinchataha jyë rë me. <sup>16</sup>Vëhë xi tijacun jyë nuju cojo xingun, hacuaha chjahyun cjuandaja rë Nina ngatsë rë xingun, sehe cumandaja me. Ngu xuta xi tyjahi cjuatacun rë me xcun Nina ne, hya xi fehya me cjuandaja rë Nina ne, tjercu vengui chjí rë cjua rë me ta, Nina ne, visecoo rë me. <sup>17</sup>Ngu xutachanga naja xi hmí rë Elías ne, vëhë ngu xuta sacuaha ngayaan. Peru cafehya nguñajacacun me cojo Nina xi cuaain tsi. Hane chuva rë jyan nu vasen ne, cavaain camahani tsi xcun nangui. <sup>18</sup>Hya xi camá ne, cafehya nga rë me Nina xi cataha tsi, hane cavuya cavaha nga tsi, hacuaha camá nga yëjë ni xitjë. <sup>19</sup>Ngayujun ni tsan ne, sa xi tjin ngu xuta ngajñi nuju xi cuetjuxin me tsëhë ndiya rë cjuaquixi, hane sa xi tjin ngu yun xi cuisekun rë me xi cuya cuisehen nga me ndiya rë cjuaquixi ne, <sup>20</sup>ninguitsjun cjua vihi: yo yun xi cuisekun rë ngu xuta tsehen xi cuetjuxin me tsëhë cjuatsehen xi sahmi me ne, ngatsë nuju ne, cuetjutje me tsëhë castigu xi cuatju me cuma. Hacuaha ngatsë nuju ne, tjercu jín jyë xi cumanchataha.